

四庫全書

集部

欽定四庫全書

石倉歷代詩選卷二百十二

明 曹學佺 編

宋詩八十九

謝翱

效孟郊體

手持菖蒲葉洗根澗水湄雲生巖下石影落莓苔枝忽
起逐雲影覆以身上衣菖蒲不相待逐水流下溪閒庭



生柏影行藻交行路忽忽如有人起視不見處牽牛秋
正中海白夜疑曙野風吹空巢波濤在孤樹落葉昔日
雨地上僅可數今雨落葉處可數還在樹不愁繞樹飛
愁有空枝垂天涯風雨心雜佩光陸離感此畢宇宙涕
零無所之寒花飄夕暉美人啼秋衣不染根與髮良藥
空爾為

又

閨中玻璃盆貯水看落月看月復看日日月從中出愛

此日與月傾寫入妾懷疑此一掬水中涵濟與淮淚落
水中影見妾頭上釵

雨宿太白

城中家斧冰此地絕炎蒸天食青童捧龍居白氣升暗
燈猶宿火寢服尚衷繒客話從前事書傳入內僧風流
今獨盡雲物老相仍淨榻搜涼卧危欄入醉凭雨師行
下界鳥夢識中乘明發甬南去他山逢智弘

採藥候潮山宿山頂精藍夜中望海

蛟門南去鳥此地望迢迢積濕侵幡黑生寒入夢飄見
燈歸舶夜聞偈解衣朝土植皆為藥山枝不滿樵暗光
珠母徙秋影石花消擬候槎回漢寧甘客老遼卻尋徐
福島因問秦皇橋于彼看日出羽旌焉可招

夜宿雪竇上方

眠山枕斧柯獨客愛盤阿畏日生塵夢尋仙到鳥窠下
方聞夕磬南斗挂秋河寢服侵雲卷頻泉通瀑和竇分
滄海月禪入沃洲歌此地猜靈聚中宵弄薜蘿

野霞觀瀑

他年疏上浮早日此中投汲飲當魚入垂綸即虬遊淨
祠無血食喫雨不腥流僧語皆前事人來盡別州草諳
長過雪沙犯欲捐湫至竟何依止蒼茫難禱求

拜玄英先生畫像

來此得公真塵埃避隱淪水生溪榜夕苔卧野衣春雨
冢侵吳甸荒祠侑漢人微吟值衰世為爾獨傷神

送汪十

多年隱賣漿此去結山房
掃菌侵花落種松如草長老
期秋欲至貧味水初嘗
歲晚逢樵獵音書定不忘

悼南上人

翻紅卷未終聞打寂時鐘
盡說他身在惟應外國逢
錫聲歸後夜琴意滿諸峰
憶昨安禪處湖雲起白龍

二月十日

山居少四鄰櫛葉半為薪
野色生遙念空江滯此身
風濤春憶越親舊晚遊秦
獨擬尋雞犬雲蘿掛葛巾

送毛耳翁之湘南

湘草碧于水王孫尚此留一身行萬里雙鬢集諸愁月
落衡雲曙龍逃海雨秋可能無事業相見竟悠悠

寒食姑蘇道中

頻年感烟草荒塚幾人耕吳越逢寒食山村見獨行天
陰月不死江晚汐徐生到海征帆影悠悠識此情

別子靜卻送之雪

獨往知吾事語離何所求故家無別業殘夢下扁舟積

葉吳宮冷吟猿顧渚秋那能不相待羈旅負清遊

懷峨眉山先生

露下濕百草病思生積愁窟泉春洗屐氈雪暮過樓魂
夢來已峽衣冠老代州平生仗忠信心世豈相仇

雨夜呈韶卿

相看隴水雲一夕幾回分預恐今宵雨他年獨自聞野
花同楚越江靄雜朝曛不得鋤芝朮逢樵邵寄君

用韻酬友人憶寄

麻衣拂去塵外事不干貧野氣生寒井天陰壓暮春間
身分楚鞫白髮作吳人已劬薜蘿青鞋憶寄頻

山寺送翁景芳歸覲

弱雲竹水湄葉影碧離離野別如秋夢他宵獨爾思林
殘西域果鐘動下方暴可得朝還暮相看長在茲

遊釣臺

古臺臨釣渚遺像在蒼烟有客隨槎到無僧依樹禪風
塵侵祭器樵獵避兵船應有前朝蹟看碑數漢年

人日雪

連年逢此日寂寞在山居故國雲歸盡高杉雪下初陰
霾占戶口雷電失天書可得俱無事清吟始晏如

早春寄嶺海流人

短褐隨南賈衰年異壯遊龍旂虛左箇鴻影別中州晚
避高麗使春乘百濟舟王孫與芳草相憶可能留

過孫君文舊避地處

相逢還自失相見盡天涯隣壤初移戍空山此寄家剪

茸春過鹿伐竹舊燒畬去後餘荒槿依溝結撰斜

奉和毛益亂經太白墳

遙知風雨後明月濕江蘼幾處如寒食荒流空暮思雨
耕侵壞冢春網得沈碑若起論茲世先生何所為

僧池青蛙

隱見多無定時開一道萍癭分荷背白身帶蘚文青吐
電收寒井隨僧入淨瓶柏壇祠后稷應有作龍吟

寄所知

欽定四庫全書

何處識君面青天雲霧裾攜琴上衡霍玄髮向風梳別
去看流水三年此躊躇偶同海鳥夢為致空中書

僧舍避暑分韻得八字

故人隔天風海水吹不立聊將塵渴心遠赴山中汲晴
香芝菌生暝翠霧露濕惟塵雞犬深幽林聽經入

五言雜詩

月離孤嶂雨尋夢下山川野冢埋鸚鵡殘碑哭杜鵑妓
收中使客民買內醫田到此聞鄰笛離情重惘然

送人還蜀

白髮夢鄉國君歸路不迷
泚槎秋見草荒棧夜聞雞
月過秦涼北星流河漢西
何因到却返吳語話分攜

憶梁禮部椅

閒庭芳桂叢相憶曙雲空
文字能娛老莓苔此興同
青山明月下家口少微東
歲晚西莊路柴門語自工

雪榻瀑布

漱石清塵暑雲深畏解攜
寒岩蕭寺下縣水薛陰西
鳥

金少日曆卷之三
卷二百十二
浴濕樓樹花流晴下溪謫龍聞咒起奇服反初筭

十日菊寄所思

籬菊是秋隣青蕤幾日新忽逢初過節相憶早衰人囊
枕離湘濕分杯度嶠貧想應無事業遙念益沾巾

仙華山招隱

軒后悲蒼劍神娥下玉簫攀髯初失夢遺蛻尚凌歌碧
墮升棺影青分產桂苗山精依鹿竹天雨濕雞翹有約
成孤憤無人重久要恭龍因姓氏使鶴語軒輶冉冉將

終老冥冥不可招無書寄青雀有恨在中條

吳越王妃歸朝

勾吳月令牽牛中翟茀乘風來闕宮隨王劍履朝上殿
黃門夜趣長春宴昭容引班入內朝龍袞當中開雉扇
宴罷朝辭坐局促詔賜離宮作湯沐先王丞嘗澤有差
上恩許歌陌上花

李侍中妾歌

李筠愛將惟儋珪美人姓劉筠侍兒城危搶擄不得力

金史卷一百一十二
卷二百十二
雨損鉛華帳下啼擁髻前言馬有幾猶說閨中那問此
赤龍從東乘日車火繞城門內蛇死英雄際會風雲奔
婦人思報羅裳恩

孟蜀李夫人詞

春荒曲薄蠶叢土屈狄歸朝辭廟主官家呼母恩許歸
劍閣并門無處所故衣升屋棺四繞出門哭子汴州道
回腸酹酒三致辭巴蜀如歸化啼鳥老身不食追爾魂
鹵簿臨門拜上恩

邸吏謁故主曲

嶺南使鶴日教戰巫女才人謔相見南橈欲載遠遊冠
衛士盜船去不還夢見隨俘上江邸道謁淒涼惟故吏
自言置邸本先王方物入朝緣此至聞言含咽淚灑江
況乃園人舊姓龐淚辭嶺南無歸處蒙恩祇向江陵住
瓊花引

后土祠前車馬道天人種花無瑤草英雲蕊珠欲上天
夜半黃門催進表酒香浮春露泥泥二十四橋色如洗

陰風吹雪月墮地幾人不得揚州死孤貞抱一不再識
夜歸閨風曉無蹟蒼苔染根烟雨泣歲久遊魂化為碧

短歌行

秦淮沒日如沒鵲白波搖空濕弦月舟人倚櫂商聲發
洞庭脫木如脫髮寒蛩哀啼衆芳歇晨梳青林望吳越
吳歛越吟浪花舞秋槎濕劍歸無所愁生酒醒聞山雞
石鏡飛花汗如雨起招如意擊樹枝為君悲歌君淚垂

賦得北府酒

北府酒吹濕宮城柳柳枝著地春垂垂
管人間新別離離情欲斷江水語女兒
連臂歌白紵淮南神仙來酒坊甲馬獵
獵羽林郎百年風物烟塵蒼老兵對月
猶舉觴青帘淚濕女牆下憎識行軍舊
司馬

秋風海上曲

秋風吹水龍上天龍女抱珠海底眠
水花生雲起如葑神龍下宿藕絲孔
巨鼇鼉鼉鼓隨赤魚鱗鬣陳旂旗
海人見此失搔網歸對妻兒月下紡
自言移家來磧中

十載秋風潮不上老夫一人語門前見此已是開皇年

虞美人草詞

髑髏起語鴟叫嘯山精夜啼楚王廟渡淮風雨八千人
叱咤向天成白道身經百戰轉危亡狼籍悲歌出漢堡
夜帳天寒抱玉泣血變草青烟曉濕他年辟仇春草生
吳中草死無妾名自從為草生西楚得到吳中猶楚舞

鴻門讌

火雲屬地汗流宇杯影龍蛇分漢楚楚人起舞本為楚

中有楚人為漢舞鵬鷃淬光雌不語楚國孤臣泣俘虜
他年疽背怒發背砭碭雲歸作風雨君看楚舞如楚何
楚舞未終聞楚歌

登廣靈寺塔望南高峰

城池風烟杯渡僧廣靈孤塔懸晝燈塔燈上齊南高雲
高雲峰巔祠歛神靈旗肅肅卷清雨結喉巫陽能楚語
回望人烟塔峰北惟有空城臨水滸赤蛇不神江海翻
藪澤狐狸作巴舞當年介弟階防禦玉鸞青鞵上天去

鄧女墓

網草新垂月中露青禽夜宿菱塘渚寺西幽修雲覆土
知葬舒玉下殤女百年光塵事事新皇子夫人墓作隣
民間厭勝祈新鬼穉鬼久隨風雨陳去來似爾勿復道
白下鍾山夢中老

逃暑崇法寺

城南古寺涼生處草色遙連孝子墓墓局雨生苔蘚文
絮娑晴挂芭蕉樹自昔聞黎脩白業會公惟與舒王接

只今塵土影堂空石上猶鐫麻紙帖

烏棲曲擬張司業

吳宮草深四五月破楚門開烏啼歇美人軍裝多在船
歸來把弓墮弓弦越羅如粟越王獻宮中養蠶不作線
輓轡出屋井水淺梔樹花姜子如繭烏棲烏啼宮燭秋
越女入宮吳女愁

廢居行

海濤翻空秋草短白蛇入窠啗雀卵經年廢屋無居人

全宋詩卷一百一十二
孕婦夜向船中產歸來多雨田生魚穴蟲祝子滿戶樞
隣家置屋供官役買得沂王園令宅

明河篇

牽牛入夜明河道淚滴相思作秋草
嫠女城頭翫月明星君冢上無啼鳥
天寒露淨濕衣巾明河倏化為白雲
雲飛蜿蜿秋在水石壓槎頭海烟起

石倉歷代詩選卷二百十二

欽定四庫全書

石倉歷代詩選卷二百十三

明 曹學佺 編

宋詩九十

文天祥

送行中齋

秋氣晚正烈客衣早知寒把衣不能別更盡此日歡出門一萬里風沙浩漫漫豈無兒女情為君思汎瀾百年

有時盡千載無餘歡明明君臣義公獨為其難寧受百折苦願持一寸丹會須撫卷人孤燈起長歎

其二

神龍蕩失水馴擾終未得威鳳雖在藪肯顧雞鶩食所以古之人受變心不易毫鼎已遷周西山竟肌瘠豫子身自漆長弘血成碧何嘗怨廢興而或二心跡堅白不在縉羔裘良自惜此義公素明俗見或未識

其三

嗟予抱區區疇昔同里閑過從三十年知心不知面零
落忽重逢家亡市朝變惻惻蹈海餘踽踽南冠殿劇談
泥塗際握手鞍馬倦依依斯文意苦恨十年晚魯仲偶
不逢隨世本非願靈胥目未抉端欲詣所見及茲萬里
別一夕腸百轉予生諒須臾孤感橫九縣庶幾太尉事
萬一中丞傳

題宣州疊嶂樓

初日照高樓輕烟在疎樹峨峨遠岫出泯泯清江去簷

隙委殘籬屋隅連宿莽薈蔚互低昂熹微分散聚城郭
諒非昔山川儼如故童髻已零落姝顏慰遲暮沈沈澹
忘歸欲歸重回顧

東方有一士

萬金結遊俠千金買歌舞丹青映第宅從者塞衢路身
為他人役名聲落塵土他人一何傷富貴還自苦東方
有一士敗垣半風雨不識絲與竹飛雀滿庭戶晨餐或
不飽夜夢無驚寤此事古來多難與俗人語

送劉其發入蜀

秋風淒已寒蜀道阻且長
虎狼伏原野欲濟川無梁
客從何處來云我之西方
蕭蕭驢驢鳴熠熠湛盧光
昔時榮華地今為爭戰場
將軍揚天戈壯士發戎行
江南有羈鳥悠悠懷故鄉
駕言與子遊雲天何茫茫

發魚臺

晨炊發魚臺碎雨飛擊面
團團四野周冥冥萬象變
疑是江南山烟霧昏不見
豈知此中原今古經百戰
英雄

化為土飛霧灑郊甸天寒日欲短遊子淚如霰

發陵州

中原似滄海萬頃與雲連
大明朝東出皎月正在天
遠樹亂如點桑麻鬱蒼煙
一鴈入高空千鴉落平田
我行天地中如蟻磨上旋
雨痕留故衣霜氣襲重氊
健馬嘶北風潛魚樂深淵
噫哉南方人回首空自憐

發潭口

吹面北風來拂鬢堅冰至
軒冕委道途衮繡易羶毳
百

年雜醜好始酌四方志浩歌激浮雲亭亭復攬轡義馭
幾曾停誰當掃幽翳

贈許柏溪惟一

長風吹飛藿清蛸吟野草流光速代謝興懷令人老遊
子中夜起悠悠酣且歌明月委清照江湖秋涉多豈無
臨緇魚亦有邯鄲酒懷古招王孫登高重回首

題周山甫錦繡段

客從西北來遺我錦繡段上有雙鳳凰文彩何燦燦置

之篋笥中歲月亦已晏天孫顧七襄雷電下河漢鳳凰
忽飛去遽然失把玩貧家機杼寒秋蟲助余歎

題高君寶紺泉

亭亭巖下泓澄碧落梧影寒瑤披清焱殘月照灑潑俯
淵測浮雲流日蕩茗穎向來滄浪歌孺子不可詞載霑
衣上塵懷古意深永招招素心人相期發深省

山中感興

載酒之東郊東郊草新綠一雨生江波洲渚失其足青

春豈不惜行樂非所欲采芝復采芝終朝不盈掬大風
從何來竒響振空谷我馬言玄黃息我西山麓

其二

山中有流水霜降石自出驟雨東南來消長不終日故
人書問至為言北風急山深人不知塞馬誰得失挑燈
看古史感淚縱橫發幸生聖明時漁樵以自適

其三

桃花何夭夭楊柳何依依去年白鳥集今年黃鵲飛昔

為江上潮今為山中雲江上潮有聲山中雲無情一年
足自念沉復百年長但存松柏心天地真茫茫

贈蜀醫鍾正甫有感

炎皇覽衆草異種多西州為君望岷峨使我雙淚流向
來秦越人朝洛夕邯鄲子持鵲經來自西亦徂南江南
有羈羽豈不懷故營何當同皇風六氣和且平

正氣歌

余因北庭坐一土室室廣八尺深可四尋單

低小白間短窄汗下而幽暗當此夏日諸氣萃
然雨潦四集浮動牀几時則為水氣塗泥半
朝蒸漚歷瀾時則為土氣乍晴暴熱風道
四塞時則為日氣簷陰薪爨助長炎虐時
則為火氣倉腐寄頓陳陳逼人時則為米氣
駢肩雜還腥臊汙垢時則為人氣或圓溷浮
屍或腐鼠雜出時則為穢氣疊是數氣當之者
鮮不為厲而余以孱弱俯仰其間于茲二年矣

是殆有養致然爾亦安知所養何哉孟子曰我
善養吾浩然之氣彼氣有七吾氣有一以一敵七
吾何患焉况浩然者乃天地之正氣也作正氣歌

一首

天地有正氣雜然賦流形下則為河嶽上則為日星于
人曰浩氣沛乎塞蒼冥皇路當清夷含和吐明庭時窮
節乃見一一垂丹青在齊太史簡在晉董狐筆在秦張
良椎在漢蘇武節為嚴將軍頭為嵇侍中血為張睢陽

髯為顏常山舌或為遼東帽清操厲冰雪或為出師表
鬼神泣壯烈或為渡江楫慷慨吞胡羯或為擊賊笏逆
豎頭破裂是氣所磅礴凜烈萬古存當其貫日月死生
安足論地維賴以立天柱賴以尊三綱實係命道義為
之根嗟余遘陽九隸也實不力楚囚纓其冠傳車送窮
北鼎鑊甘如飴求之不可得陰房間鬼火春院闕天黑
牛驥同一皁雞棲鳳凰食一朝濛霧露分作溝中瘠如
此再寒暑百沴自辟易嗟哉沮洳場為我安樂國豈有

他繆巧陰陽不能賊顧此耿耿存仰視浮雲白悠悠我心悲蒼天曷有極哲人日已遠典刑在夙昔風簷展書讀古道照顏色

余自高亭山為北所留深悔一出之誤聞故人劉小村陳蒲塘引兵而南流涕不自堪

只把初心看休將近事論誓為天出力疑有鬼迷魂明月夜推枕春風晝閉門故人萬山外俯仰向誰言

余以議論太烈北愈疑憚不得歸闕將校官屬

日以叛去世道可歎

悠悠天地濶世事與誰論清夜為揮涕白雲空斷魂死
生蘇子節貴賤翟公門前輩如瓶戒無言勝有言

天台杜澣字貴卿號梅壑糾合四千人欲救王
室當國者不知省正月十三日見余於西湖
上余嘉其有志獎異之十九日客贊余使北
梅壑斷斷不可客逐之去余果為北所留後
二十日驅余北行諸客皆散梅壑憐余孤苦

慨然相從天下義士也朝旨特改宣教郎除
禮兵架閣文字

伏節辭王室悠悠萬里棘諸君皆雨別一士獨星言啼
鳥亂人意落花銷客魂東坡愛巢谷頗恨晚登門

聞雞

軍中二十日此夕始聞雞塵暗天街靜沙長海路迷銅
駝隨雨落鐵騎向風嘶曉起呼詹尹何時脫蒺藜

平江府

樓臺俯舟楫城郭滿干戈故吏歸心少遺民出涕多
鳩居無鵲在魚網有鴻過使遂睢陽志安危今若何

沈頤家 余回京口北人歎之府中余不得離
岍上得沈頤家坐卧北不意余為逃計也

孤舟霜月迴曉起入柴門斷岍行簪影荒畦落履痕江
山渾在眼宇宙付無言昨夜三更夢春風滿故園

長溪道中和張自山韻

夜靜吳歌咽春深碧血流向來蘇武節今日子長遊海

角雲為岬江心石作洲大夫竟何事底用泣神州

即事

去年傷北使今日歎南馳雲濕山如動天低雨欲垂征
夫行未已遊子去何之正好王師出崆峒麥熟時

英德道中

海近山如沃林深屋半蕪乾坤正風雨軒冕總泥途自
歎鵞肩薄誰憐鶴影孤少年狂不醒夜夜夢伊吾

別里中諸友

青山回首風雨暗啼猿楊柳溪頭釣梅花石上尊故人無復見烈士尚誰言長有歸來夢衣冠滿故園

建康

金陵古會府南渡舊陪京山勢猶盤礴江流已變更健兒徙幽土新鬼哭臺城一片清溪月偏于客有情

真州驛

山川如識我故舊更無人俯仰干戈跡往來車馬塵英雄遺算晚天地暗愁新北首燕山路淒涼夜向晨

固陵道中

九天雲下垂一雨作秋色塵埃化泥塗原野轉蕭瑟十里一雙堠狐兔卧荆棘見說數年來中州乍蘇息

發東阿

東原深處所時或見人煙秋雨桑麻地春風桃李天貪程頻問堠快馬緩加鞭多少飛檣過噫吁是北船

保州太祖墓

我行保州塞御河直其東山川猶有靈佳氣何鬱葱顧

我巾車因厲氣轉秋蓬
辦香欲往拜惆悵臨長空

除夜

門掩千山黑孤燈伴不眠
故鄉在何處今夕是窮年
住世真無係為囚已自然
勞勞空歲月得死似登仙

元日

慙愧雲臺客飄零雪滿壇
不圖朱鳥影猶見白蛇年
宮殿荒烟隔門庭宿草連
乾坤自春色回首一潸然

送曹大著知廣德軍

暫屈瀛洲客來臨汭水民山川歸史記岳牧屬詞人館
舍朋簪舊都門祖帳新儒林官可紀何止更稱循

題陳國秀小園

長鶴展輕翮遠棲松桂林故宇入清夢盤盤入苦心中
林風月賒十畝團幽陰林下有奇士繞樹從之吟

聽羅道士琴

斷崖千仞碧下有寒泉落道人揮絲桐清風轉寥廓飄
飄襟袂舉冰紉不禁薄紫烟護丹霞雙舞天外鶴

題吳城山

龍行人鬼外神在地天間
彭蠡石砮出洞庭商舶還
秋風黃鵠遠春雨白鷗閒
雲際青如粟河流接海山

予鄧峒 巽齋歐陽先生為吟鄧峒賦詩以孝
子慈孫望于人先生之盛心也敢不拜手敬
贊鄧君勉之

乃翁猶旅殯霜露幾君蒿
日與清江遠雲連桂嶺高
時無郭元振夢有令狐綯
目斷方田墓招魂我欲騷

文山即事

宇宙風煙濶山林日月長
開灘通燕尾伐石割羊腸
盤谷堪居李廬山偶姓康
知名總閒事一醉棹滄浪

山中和韻

白扇揮殘暑青鞋踏嫩晴
花牀尋小隱石鼎引長鳴
紗帽有時去酒壺惟意傾
山僧癡與坐閒却瘦彌明

病中又賦

驟雨知何處一溪秋水生
苦吟肩鶴瘦多病耳蟬鳴
隱

几惟便睡挑書正倦行山深明月夜巧我半窓清

別謝愛山

君今拂衣去我獨枕書眠一片過林雨數聲當戶蟬情
長空有恨吟苦不成篇後會知何日西風老雁天

病愈簡劉小村

倦餘心似醉病起首如蓬黃竹斷橋雨白蘋長笛風僊
僊鷗屨舞咄咄鴈書空孤負秋來眼閒挑繫下桐

病坐偶成

蕭蕭秋夜涼明月入我戶攬衣起中庭仰見牛與女坐
久寒露下悲風動紈素不遇王子喬此意為誰語

曉起

遠寺鳴金鐸疎窓試寶熏秋聲江一片曙影月三分倦
鶴行黃葉癡猿坐白雲道人無別事抱膝看回文

拜羅氏百歲母之明日主人舉酒客張千載心
賦詩某喜贊不自已見之趣韻

翠微三島近畫閣五雲橫春水鷗聲滑夕陽鴉背明尊

前持一笑花下卧餘醒曾見瑶池母不為虛此生

醉清湖上三日存叟獨不在坐即席有懷

石鼎吟方透瑤觴醉未闌疎林花密綴舊壘燕新安春
半湖山好夜深江海寒王孫隔芳草初月正相看

題楚觀樓

西風吹感慨曉氣薄登臨半壁楚雲立一川湘雨深乾
坤橫笛影江海倚樓心遺恨飛鴻外南來訪遠音

余題鬱孤泉五湖翁姚濂為之和翁官滿歸里

因韻贄別并謝前辱

巢龜君住好，涌翠我來遲。
夜雨呼三韭，春風試一旗。
飛花行客夢，芳草故人思。
何日五湖上，同看浴海曦。

用韻謝前人

茲遊良邂逅，吾道未遑遲。
斗野橫雙劍，牛津直兩旗。
北風應小住，明日便相思。
輸與君家近，扶桑五色曦。

海上

天邊青鳥逝，海上白鷗馴。
王濟非癡叔，陶潛豈醉人。
得

常須報國可隱即逃秦身世何時定挑燈看劍頻

泰和

書生曾擁碧油幢恥與羣兒共豎降漢節幾回登快閣
楚囚今度過澄江丹心不改君臣誼清淚難忘父母邦
莫訝鄉人知我瘦經旬絕粒坐蓬窓

和中齋韻

功業飄零五丈原如今局促傍誰轅
俛眉北去明妃淚啼血南飛望帝魂
骨肉凋殘惟我在形容變盡只聲存

江流千古英雄恨
蘭作行舟柳作樊

有感

石郎草草割山川
一落人手三百年
八州風雨暗連天
三皇五帝如飛烟
人人野祭伊水邊
春秋斷爛不復傳
白頭潦倒今魯連
夜深危坐日晏眠

和蕭安撫平林送行圖

得失元來付塞翁
何心桃李問東風
人皆有喜榮三仕
我尚無文謝五窮
秘苑固知朋可正
畏途猶恐甲方衷

欲酌長者殷勤祝坎止流行學四忠

題碧落堂

大厦新成燕雀歡與君聊此共清閒
地居一郡樓臺上人在半空煙雨間
修復盡還今宇宙感傷猶記舊江山
近來又報秋風緊頗覺憂時鬢欲斑

和韻送逸軒劉民章

少日屠龍事已勞送人千里發江濤
蓬萊地近風方細閭闔門開日正高
春裏看花須款款雨中剪韭且陶陶

金吾已辦長安月雙鳳扶雲立海鼇

山中即事

攜壺藉草醉斜陽白鶴飛來月下雙蘆葉西風驚別浦
芭蕉夜雨隔疎窻千年帝子朱簾夢一曲仙人鐵笛腔
若問山翁還瘦否手持漁竹下寒江

送人往湖南

鴈拖秋月洞庭邊客路淒涼野菊天雲隔酒樽橫北海
風吹藜杖落西川夜深鬼火千山雪春後鶻花一樹烟

為我祝融峰上看朝暎白處禮蓬仙

七月十三夜用燈牌字韻

赤壁當年賦子虛西風忽復到菰蒲蟾蜍影裏千秋鑑
蟋蟀聲中七月圖詩思飄飄入雲漢歌聲隱隱動江湖
萬家簫鼓連燈火見說年來此事無

挽李制帥

世變江河渺未涯如公真是濟時危幾年荆益龍驤譽
一日瀟湘鵬識悲天下皆傳清獻節人心自有武侯碑

郎君昔共慈恩約投淚西風寄些詞

贈周東卿畫魚

觀君瀟湘圖起我濠上心短褐波濤舊秋雨菰蒲深

禪關

秋風吹日上禪關路入松花第一灣只願四時烟霧少
滿城樓閣見青山

塵外

半山風雨截江城未脫人間總是塵中夜起看衣上月

青天如水露華新

雲端

半空夭矯起層臺
傳道劉安車馬來
山上自晴山下雨
倚欄平立看風雷

附謝枋得詩

字公直別號疊山文節其門人私謚也信之弋陽人宋亡不仕元迫之絕

粒而死

謝人冬至送酒鴨

陽復且閉關
萬物畏坤含
雙鳬飛天外
鷺食何貪婪
儒

道又一泰十年亂愈餓誰家讀書堂庭階無青蘆此時
談詩書蓮經提魚籃平生太玄文知者無一譚之子愛
野鶩驥駒舞兩驂厚顏酒食饌不獵懸鵲鷦寒威甚毒
矢三杯勝七鋤爛醉尋梅花登峰吾尚堪

菖蒲歌

有物奇峭天琢成有草夭夭冬夏青人言菖蒲非一種
上品九節通仙靈異根不帶塵埃氣孤操愛結泉石盟
明窓淨几有宿契花林草砌無交情夜深不嫌霜露重

晨光疑有白雲生
神農已知入本草
靈均蔽賢遺騷經
幽人耽翫發仙興
方士服餌延脩齡
綵鸞紫鳳琪花苑
赤虬玉麟芙蓉城
上界真人好清淨
見此靈苗當大驚
我欲攜之朝太清
瑶草不敢專芳馨
玉皇一笑留香案
錫與有道者長生
人間千花萬草儘
榮艷未必敢與此
草爭高名

荊棘中杏花

牆東荒蹊抱村斜
荊棘狼籍盤根芽
何年丹杏此留種

小紅濺濺爭春華野人慣見謾不省獨有詩客來咨嗟
天真不到鉛筆富艷自是宮闈花曲池芳徑非夙昔
蒼苔濁酒同天涯京師惜花如惜玉曉檐賣徹東西家
杏花看紅不看白十日忙殺遊春車誰家園裏有此樹
鄭重已著重幃遮阿嬌新寵貯金屋明妃遠嫁愁清笳
落花紫簾拂牀席亦有飄泊沾泥沙天公無心物自物
得意未用相凌誇黃昏人歸花不語惟有落月啼樓鴉
崇真院絕粒偶書付兒熙之定之并呈張蒼峰

劉洞齋華雨

西漢有臣龔勝卒閉門不食十四日我今半月忍渴飢
求死不死更無術精神常與天往來不知飲食為何物
若非功行積未成便是業債償難畢太清羣仙宴會多
鳳簫龍笛鳴瑤瑟豈無道兄相提攜騎龍直上寥天一

和道士陳天隱

學道無魔道不成神人得計是無名光風自覺長瀟灑
明月何曾有死生早悟梅山難養性何如福地別尋盟

梅花香裏堪聯句莫笑人間石鼎鳴

送程楚翁遠遊

近日人傳庾嶺梅南枝落盡北枝開長安舊日元無此
盡是江南人送來

寄謝叔魯

紅葉飄搖霜露清去年今日正同行夜來似與君相見
明月一窻梅影橫

桃

尋得桃源好避秦
桃紅又見一年春
花飛莫遣隨流水
怕有漁郎來問津

蠶婦吟

子規啼徹四更時
起視蠶稠怕葉稀
不信樓頭楊柳月
玉人歌舞未曾歸

石倉歷代詩選卷二百十三

欽定四庫全書

石倉歷代詩選卷二百十四

明 曹學佺 編

宋詩九十一

陳普

擬古

秋聲金氣流
天空露瀼瀼
素波合流月
淫淫滿庭霜
遙夜一美人
寒閨自傍徨
暗塵集凌波
輕颺感鳴璫
天性

賦貞清動止中矩方世無夔夔子窈窕空英皇抱璞如
臨淵日入不下堂時操弄玉簫空中來鳳凰歲月如流
星髮變面欲黃服玉固雪膚絕意百兩將

又

秋夜永如年四壁號寒蛩明月照樹葉白露啼青桐寒
窻紫玉琴時變羽凌宮三彈不成調百憂鬱攻中

又

東方有樂國開闢先栢皇鸞鳳為雞鶩麒麟為犬羊晨

霞作朝食太和為酒漿土無干戈禍人各千年長下視
禹九州有土皆戰場白日虎狼行青天蛟龍翔我欲為
遠遊滄海渺無梁何年夸娥氏移置天中央

又

同根一味草時命嗟異遇風月芳香合兩地隔周楚爾
生麟趾家朝夕沐玉露我在雲夢林百草相蒙垢白壁
終不緇惇惇亦良苦

和友人韻

兒童恨芳草不識春長在簾櫳日晏如馬知顏樂改黃
鶴雅入聽鶻鴂亦可罪混沌何曾死拱壁莫輕碎野馬
恣流行遊絲無罣礙緬懷良友心不言默相對願為蛩
駝交共話螻蛄戴

望雲

幾愛山中雲杳藹起無跡晴風吹綠樹天節日已尺悠
揚幾片飛出岫度絕壁斂作蒼狗形舒為鯢鵬翼朝抹
我媚青暮醺滄海碧江南與江北蕩蕩恣所適何如雲

中仙避囂隱幽寂採藥雲下林礪劍雲上石乘雲騎茅
龍倚雲吹鐵笛我欲往從之飄然不可測

壬辰日蝕

憶昔度宗皇帝時十年十三日食之似道屬鼎湖海曲
天子宫庭耽樂嬉滿朝翕翕皆婦人禍來照鏡方畫眉
北軍順流日食既兩國正爾爭雄雌興亡豈必皆有數
百年以來士氣衰文臣髀肉不識馬武士驚魄怕見旗

凭欄

高豁乾坤眼山晴綠雨收夕陽流水遶荒草白雲浮柳
陰小溪側樵歌古渡頭凭虛發清嘯安得仲宣樓

德陽林梅麓太守輓章

殷士皆周祿南音獨楚冠寢車人更怒負俎我何安義
合雍容就名應久遠看梅花真鐵石耐得許多寒

野燒

雜沓平原起電紅憑陵勢欲逼青峰草茅不問新開甲
蟄戶尤怜乍啟封何暇屑侯分玉石畧如伯益逐蛇龍

際天逸德無人問獨倚高樓到晚鐘

懷古

世事悠悠一轉頭斷雲荒草古今愁青山北去黃河隔
白日西飛東水流秦有金牛開劍閣楚無熊虎割鴻溝
多情蕭寺峯前月幾夜蛩聲影半樓

答友人

雲作交遊山作賓道心為主自安貧柴門無鑰見同物
竹帛有名終累人綠水一潭澄靜性青山萬疊裹閒身

紛紛望拜馬蹄下不見胸中萬斛塵

贈清叟行

共君一夜話三生語正投機君又行溪柳效顰添別恨
岸花和意送離程驚時莫問歸巢燕贈別愁聞求友鶯
今夜夢中重聚首雞聲茅店已三更

秋日即事

夜牀輾轉恨明遲曉髮梳寒倚竹扉樹影紙窗風作色
蛩聲壁罅月流輝三杯白酒窮年客滿篋紅塵隔歲衣

遙想白鷗江上路
蓼花楓葉雨霏霏

玉露金莖曉髮寒
秋風仍作去年看
蛩聲疎雨長為客
鴈影殘蟬獨倚欄
鐵硯窻櫺雲影淡
丹楓溪曲水痕乾
西風曾與黃花約
擬掇繁英貰酒餐

二尺書檠對影居
西風吹雪上吟鬚
雲邊月色人千里
竹裏秋聲酒一壺
客思邇來紅葉亂
鴈聲南去白雲孤
季鷹自是知機者
一念尊鱸便到吳

書餘飲水枕長肱
四壁啼蛩訴不平
月色滿窻詩骨冷

露華方枕夢魂清西風歲歲長堤柳流水朝朝滄海情
紅葉山深無鴈過殘砧幾處搗愁聲

遊絲閃閃掛虛簷翔集號寒華嶽尖白髮東來閒點易
烏衣歸去寂鈎簾三千客路飛楓葉四五人家賣酒帘
魚笛水寒江上晚荒叢荳葉雨纖纖

鼓瑟

滿樓明月調雲和五十絃中急雨過彩鳳拂衣鳴翠竹
素鱗鼓鬣出寒波淒涼楚客新愁斷清切湘靈舊怨多

一曲更沈人已靜江頭雲掛綠嵯峩

朱絃聲奏徹雲清有客沈吟倚柱聽遺響一時存楚曲
斷魂千載寫湘靈珠隨明月生滄海船挾悲風過洞庭
絃縈無言膠柱倒遙遙江上數峰青

溪莊

疇昔何來此青山與白鷗絮飛春不去潮返月頻留

野步十首

南鴈數聲嘹唳西風雙鬢盤髮病葉夕陽滿樹斷雲殘

雨歸岩

瀟洒枯藤老屨行行只復行行泥路野人屐跡石橋流水琴聲

黃犢眼中荒草鷺鷥立處枯荷宦海風濤舟楫故山烟雨松蘿

愁思冥鴻杳杳吟情敗葉紛紛歸去滿身溪雨醉眠半枕山雲

白日長繩難繫青帘濁酒堪賒歸鶴蒼山雲際故人錦

字天涯

紅葉林風颯颯
蒼苔徑雨斑斑
人跡石邊流水
樵歌鳥外青山

流水數株殘柳
西風兩岸蘆花
荒草客愁遠道
夕陽半帶歸鴉

按步緩尋幽草
揚眉一望平林
鳥影漁磯日暮
荳花村屋秋深

幾處漁樵石路
數家雞犬柴門
竈屋殘烟杳靄
溪流淡

月黃昏

木葉西風古道稻花北隴新田流水美人何處夕陽荒
草連天

自哂五首

曾騎白鶴上揚州頭上花枝秉燭遊樽酒邇來誰是伴
白雲收盡數峰秋

鬪雞走馬醉高陽今日歸來兩鬢霜無限少年心上事
半簾荳雨語寒螢

古樹閒雲獨抱琴
琴聲寂靜樹雲深
相如渴死文君老
辜負題橋萬里心

世事悠悠酒幾盃
晴蒼把鏡獨徘徊
西風吹老梧桐樹
仍送新霜兩鬢來

寬博麻衣折角巾
疎慵不似少年身
白雲半枕山中午
猶夢乘槎去問津

邵武泰寧途間一路海棠

萬騎連接出襄國

趙石虎都襄國作
萬花騎出入隨從

諸娖撩亂上驪山

唐明皇同貴妃每年十月幸繡嶺諸姨別色隨從望之如錦

道人不識紅粧面何事

扶筇過此山

歸鳥

紫山青嶂盡如家
負日衝煙復帶霞
今古乾坤秋一幅
幾番歸鳥與棲鴉

七夕

但把凡身小品論
寧須搨額問星辰
女郎戀別淚如雨
遑托金針度與人

四皓

長樂卮前露雪眉
巖花亂笑出山時
有人拍手瓜田裏
來往青門總不知

李廣李陵

茂陵無奈太倉陳
槐里家傳本助秦
萬落千村荆杞滿
隴西桃李亦成新

賈生

落日長沙被鵬驚
愁來強把死生輕
洛陽才子多流涕

太息沾襟過一生

武帝

商車不足算緡來桑孔咸陽悉茂材一撮茂陵無覓處
建章門戶至今開

幾多愛子出蕭關山積胡沙骨未還好把望思臺上淚
隨風北去洒陰山

五十餘年四海波建元三載盡征和中央寸土纔無血
沃日澆天瓠子河

荀彧

亂離揀得一枝棲得道爭知却是迷曹操若逢諸葛亮
暮年當作漢征西

河濟太山猶是漢勿勿把作賊關中久知天下無劉氏
不料人間有孔融

北地王諶

何物譙周口似簧幾年漢帝手牽羊紛紛蜀土祠諸葛
香火曾分北地王

晉武帝

杳杳羊車轉掖庭夕陽亭上北風腥紛紛羔羯趨河洛
為見深宮竹葉青

梁武帝

戒捨工夫老未圓百雙雞子送殘年一生般若成何事
贏得江頭載荻船

附韓信同詩 先生生於宋末八元不仕建安劉

文簡孫菊磻隨齋二公以幣招長雲莊書院先

生一以四書六經為課試法其重經術而末文
藝也如此先生伯循其字別號古遺與石堂先
生同里而及其門因得以詩附焉

岳王墓

妖星隕地芒角赤龍劍悲吼風蕭瑟中原王氣挽不回
將軍一死為毛擲秦家小兒真戲劇播弄造化搖樞極
指讐為親忠且逆隻手上遮天眼碧九重茫茫隔天日
無由下燭臣愚直臣愚萬死不足惜國恥未湔猶憤激

古墳埋冤血空瀝風雨年年土花蝕我恐精忠埋不得
白日英魂土中泣請將衰骨斲苔痕獻作吾皇補天石

翠屏霽雪

寒林靜對展翠屏六花粧點風景新四山簇簇瓊瑤樹
恍然照映芝蘭庭寒生時光色爍爍含輝照耀銀海明
巉巖石化崑山玉負暄猿猱出深谷可憐不老山白頭
梅萼藏春暗香馥紫陽留識歌翠寒中有玉人在其間
道傳前聖發未發教開來學難亦難豁然胸次冰雪釋

白照紅日上團團

蓬萊飛峰

海上神山名自昔來去隨潮無定跡
天人俯覽念虛浮
六鰲頂戴窮神力棲仙貝闕蕊珠宮
多種瑤芝瓊草碧
依然根著不堅牢飛入石堂作南壁
螺紋螭跡石龍存
雲氣隨潮時雨濕仙風颯爽生羽翰
招納霓裳羽衣曲
試登絕頂望五湖高接洞天纔咫尺
藥爐灰冷多登真
九轉丹成人未識雲間鶴跡托來篇
王鄧真人久相憶

碁盤仙跡

唐山絕頂碁盤石
戲局流傳名自昔
殷勤細問白髮翁
云是仙人曾對奕
苔封石磴不敢移
竹引清風時拂拭
箇中黑白子不留
想是仙童為收拾
又不聞採樵之人
王子質邂逅仙人
執手談羸輸未決
藏機密貪看爛柯
不知時少憩山中
方七日誰識囊中
日月長歸來塵世
無相識

雙柱擎天

白鶴峇堯枕江曲接岫連峰衍林麓石堂峻峭萬山雄
擁翠亭亭多喬木雙撐石柱峙東南勢力擎天名不俗
鍾英特產棟梁材不墜簪纓美如玉左接蓬萊古洞天
峯前水帶縈九曲依然幻出武陵源擬就峯傍新卜築
鶴歸錯認華表存應笑世人枉追逐

右石堂山中八景今存其四

石倉歷代詩選卷二百十四

欽定四庫全書

石倉歷代詩選卷二百十五

明 曹學佺 編

宋詩九十二

王栢

赤松即景

平生百慮懶尚有丘壑心佳哉二三友同盟時幽尋壯
懷豁虛曠玄宮窮邃深時方釀薄暑萬綠漲雲岑新篁

疑粉翠日影篩碎金瘦筇扶野步羽扇搖清吟漱齒掬
清泚雪瀑開風襟脫巾挂琪樹露頂涵重陰山禽自在
語濁醪自在斟物外轉栖碧石險蒼苔侵何時侶麋鹿
結茅入深林

和葉聖子小桃源韻

二仙何如人夫豈古隱士道成邈次寥羊卧不再起鸞
鶴舞松聲蕭騷快心耳金竈清塵生餘丹不輕委我來
桃源遊直窮路所止飛蘿搖春烟素雪噴清泚何時架

草堂深入此山裏
翛然逃世慮
鍊魄繼遐軌

送立齋入閩哭久軒

雙溪秋氣深
送子臨古道
古道如掌平
四顧行人少
行復行行何日
度南嶠
故人今已矣
轉憶平生好
世事浩無涯
愁雲黯江表

送希夷之江西

小雨斂輕塵
秋聲滿亭驛
驅車過南浦
別懷徒襞積
世道斯凌夷
為善不自力
一朝魯兩生
為人作行色
誰知

離索悲有甚萬鍾失

和寬居見懷韻

北望戲馬臺荆榛滿中路英氣一何多懷古渺難沂山
河腥日月虎豹沐雨露纍纍楚猴冠異哉天所賦豈無
濟川才淹留秋不暮清風從何來灑灑定吾故贈我金
琅玕鑿落雙魚素

秋熱

西風不力征老火未甘退蟬聲亂耳繁癡蚊健始最一

雨從天來不復有故態天序自分明人心其少耐

舟中和葉聖予

桐江波漸滑霽色午方開香火嚴蘭若烟霞老釣臺崖
高傲徑險水轉萬山回欲訪先生裔相從買一坏

其二

江濶風帆急潮回沙露痕寒林無剩葉茅舍各成村鴈
落煙波渺鴉歸野色昏未知孤客棹今夜泊誰門

野興

文字飢難煮為農策最良興來鋤曉月倦後卧斜陽秋
稼連千頃春花醉幾場任他名利客車馬逐康莊

和趙師日韻

我生無燕頤四壁笑相如門巷堪羅雀燈窓且讀書老
來心事懶貧後故人疎尚有多情月時時到敝廬

蘭

早受樵人貢春蘭訪舊盟謝庭誇瑞物楚澤擷芳名蒼
玉栽圭影紫檀含露英奚奴培護巧苔蘚日菁菁

催雨

人世如居甌驕陽不可鉏未聞芻作狗安得夢維魚賦
斂民生搞干戈國計虛安危關一飽雨意莫躊躇

題定武蘭亭副本

玉華末命昭陵土蘭亭神蹟埋千古率更搨本入堅珉
鹽帝歸裝投定武薛家翻刻愚貴遊舊石宣和龕御府
胡塵橫空飛渡河中原荊棘穴豺虎維揚蒼茫駕南轅
百年文物不堪補紛紛好事競新模傾敝醜俗亡遺矩

如今薛本亦罕見髣髴典刑猶媚嫵清歡盛會何足傳
右軍他帖以千數託言此筆不可再慨然陳迹興懷語
今昔相視無已時手掩塵編對秋雨

適莊兄遊山

誰閣重陰一日晴清遊應是愜高情遙知雨後山光好
但想雲邊屐齒清素壁雖曾題舊字沈疴不許畝新盟
因知闕吏留魚鱗謾遣奚奴候晚程

題山橋

北山之北兩山齊一逕蜿蜒石作梯腳力倦時山始好
芙蓉東畔赤松西

其二

石磴斜溪下水隈玉虹鎖雪掛崔嵬雖然只是泉三疊
滂湃聲搖萬壑雷

附劉迎詩

雲中君圖

衣若新沐蘭湯薰靈巫拜舞方迎神恍然相見帝者服

九歌昔詠雲中君畫史亦可人妙入造化域羽衣玉塵
美且閒此意不知何處得空明倏忽紛溟濛胡為眷眷
臨壽宮飄然來下復遠舉想像決去隨飛龍祠空人散
秋蕭瑟落日猿聲喚秋色湘天極目青茫茫憑高一望
無南北

梁忠信平遠山水

憶昔西遊大梁苑玉堂門閉花陰晚壁間曾見郭熙畫
江南秋山小平遠別來南北今十年塵埃滿目不見山

烏靴席帽動千里只慣馬蹄車轍間明窓短幅來何處
亂點依稀浣寒具煥然神明頓還我似向白玉堂中住
濛濛烟靄樹老蒼上方樓閣山夕陽一千頃碧照秋色
三十六峰凝曉光懸崖高居誰氏宅縹緲危欄蔭青樾
定知枕石高卧人常笑騎驢遠遊客當時畫史在上方
想見泉石成膏肓獨將妙意寄毫楮我愧雨立隨諸郎
此行真成幾州錯區區世路風波惡還家特作發願文
伴我山中老猿鶴

連日雪惡用聚星堂雪詩韻

朔風朝來放雲葉紛紛吹落籠沙雪山河大地同一如
變化須臾亦奇絕參天松頂老猶強搶地竹頭低欲折
亂飄書帙愛窓明狂入地爐驚火滅重衾方擁膚尚栗
凍筆將書肘先掣未容衰白點鬢華只許醉紅生面頰
何人清唱墮梁塵有客高吟霏鋸屑昔賢句法今尚在
故事歷劫徒能說是中聖處公會無一粒靈丹工點鐵

題十眉圖

寶箱拂塵金鋸膝周昉丹青見真筆春風曾憶賦妖嬈
人共畫圖成十一燭奴香底花光凝錚錚鐵響聞三更
車聲雷動不通語眼態波橫空送情蠻雲盤鶴遼天濶
犀玉依依對書札人生何處不相逢還醉武陵溪上月

郭熙秋山平遠用東坡韻

槐花忙過舉子閒舊遊憶在夷門山玉堂會見郭熙畫
拂拭縑素塵埃間楚天極目江天遠楓林渡頭秋思晚
烟中一葉認扁舟雨外數峰橫翠巘淮安客宦踰三霜

雲夢澤連襄漢陽平生獨不見寫本慣飲山綠飡湖光
老來思歸真日日夢想林泉對華髮丹青安得此一流
畫我橫筇水中石

海上

潮颺三山島烟橫萬里沙蜃樓春作市鼉鼓暮催衙一
曲水仙操片帆漁父家安期定何處試問棗如瓜

秋郊

秋水四五尺暮山三兩峰浮雲白毫相落日紫金容蓑

笠前村笛樓臺古寺鐘殷勤小平遠圖畫憶渠儂

代人憶舊

緩步素絲障微吟紫綺裘醉便風側帽歌愛月明樓犀
軸題春恨銅荷滴夜愁風流十年夢燈火漫揚州

題雪浦人歸圖

亂日寶花雨過眉斑竹筇拏音迎畫鷁喜態動烏龍水
鏡千江月風琴萬壑松遙知永今夕情話得從容

彥美生朝

壯日里間俠臂彎雙角弓繡鞵紅匝貂袖紫蒙茸雲
態自蒼狗玉輝猶白虹為君占壽骨綽起有清風

車轆轤

馬虺隤牛齷齪山行縈紆車轆轤路傍指點是官人老
矣一翁雙鬢白汝牛幸可耕汝馬幸可騎有此可載琴
書歸胡為奔走東西道白髮刁騷被人笑

沙漫漫

沙漫漫草斑斑南山北山相對看我行乃在山之間行

人仰不見飛鳥樹木足知邊塞少沙漫漫草斑斑我行
欲趁西風還僕夫汝莫愁衣單我但著衣思汝寒

寄題安崑起官舍北溟

一軒高占鳳麟洲要作人間汗漫遊海國風煙自朝暮
洞天日月幾春秋夢魂欲拂三花樹生計聊隨一葉舟
待我丹成訪君去閭風佳處卜菟裘

莫州道中

楓林葉葉墮霜紅天末晴華一鏡空野曠微聞鳥鳥樂

草寒時見馬牛風
人生險阻艱難裏
世事悲歌感慨中
白髮孀親倚門處
夢魂千里付歸鴻

和人七夕韻

今古良宵此會同
望窮雲物有無中
人間鈿合三山隔
天上靈槎一水通
鵲樓空紈扇月
鴛鴦機冷苧羅風
不須更乞蛛絲巧
久矣人生百巧窮

題吳彥高詩集後

片雲蹤迹任飄然
南北東西共一天
萬里山川悲故國

十年風雪老窮邊，名高驥北無全馬。
詩到西江別是禪，頗意米家書畫否。
夢魂應逐過江船。

代王簿上梁孟容副公二首

妙年椽筆賦長楊，一日聲名滿四方。
天上風流青瑣客，人間嘉慶綠衣郎。
錦囊看讀金花誥，畫戟閒凝燕寢香。
預恐政成趨急詔，海沂無計駐王祥。

自笑微官馬骨高，十年霜鬢雪刁騷。
長林豐草未適性，尖帽短靴安得豪。
名宦真同一雞肋，簿書空束兩牛腰。

故園清興湖山裏歸去經營一把茅

清明前十日作

雨餘天氣動朝寒寒食都來數日間羯鼓催開小桃李
畫屏圖出好溪山塵埃老我真堪笑風物撩人欲破慳
梅雪已殘春過半一樽何處與公閒

聞丘文晚集慶壽作詩戲之

桃李欲開風雨多花時猶得屢經過緩聽一曲玉連瑣
滿泛十分金卷荷紅燭影紗聞喚馬翠羅承襪見凌波

杜陵老矣孤春事奈此詩愁惱亂何

明日復會客普照繼呈此詩去及瓜不數日矣
室中呼起散花天來伴維摩到處禪百刻篆香消晝永
一番花雨破春妍雲山真欲追聲叟風腋何妨借玉川
他日相思共明月舊遊應說禁烟前

觀古作者梅詩戲成一章

翠袖佳人脩竹傍風姿綽約破湖光靜中慣識形神影
妙處誰知色味香觀想有靈通水月孤音無伴挾冰霜

故人愁絕今何許
烟雨霏霏子半黃

上施內翰

十年不見建安公
草木依然臭味同
賴有酒樽煩北海
可無香瓣禮南豐
天墀禮樂三千字
海國鷗鵬九萬風
正以高軒肯相過
免教書客感秋蓬

聞彥美服藥以詩問訊

耳邊塵事且無喧
聽我歸耕郭外村
賤子自藏蝸殼舍
故人誰並雀羅門
書窓共作三年計
樽酒相逢一笑溫

不信家山不堪隱仇池今在古銅盆

次劉元直韻二首

秋來何事憶歸頻正以家無姑婦津未許桂枝招隱士
不妨桃葉贈行人夢魂歷歷千山遠客宦悠悠五斗貧
犀箸鸞刀許何日歸來舉案得紛綸

半年歸夢別離間只有音書鴈足還羅幙翠橫秋掩冉
玉壺紅濕淚瀾斑天明不作霧非霧月破可憐山復山
准擬春風對眉牕一樽相對洗愁顏

和曹次仲韻因以自感

自笑區區學道難未容香火訪名山因循憂患餘生裏
收斂光芒窘步間白社祝公今日始丹丘容我幾時還
相從願結翻經會共過壺中日月間

陪諸友登三山亭

半濠清淺芰荷彫落日登臨未寂寥山色逼秋渾作市
海聲迎暮欲吞潮沙頭白鳥疑相熟木末青旗苦見招
不似常時對官府可無閒話及漁樵

次韻夜雨

海山何處是蓬瀛
節物催人意自驚
客裏厭逢今舊雨
夢餘愁聽短長更
故園頗覺歸期緩
老境難堪末段清
想得詩成正蕭瑟
竹窓燈火夜微明

題歸去來圖

筆端奇處發天藏
事遠懷人涕泗滂
餘子風流追魏晉
上人談笑自羲皇
折腰五斗幾錢直
去國十年三徑荒
安得一堂重寫照
為公桂酒瀉蕉黃

寄題孔德通東園

花木陰陰一畝宮平生高興與誰同
樽罍北海無虛日鄉里東家有故風
先業固知衣鉢在大門應惜橐奭空
襄陽耆舊今誰識尚喜風流見阿戎

昌邑道中

屋角雞號夜向晨客牀相對話悲辛
流離僅脫膾等伍老大空為濟上人
却掃欲安無事貴累人猶說立錫貧
故山鄰里今安否歸去同尋笋蕨春

題仲山枝巢

鏡中青鬢入霜皤歲月從交落魄過物理不容人過分
生涯休歎我無多百年竟似蠅鑽紙萬事終同鼠飲河
祇恐徐公宿緣在東風時夢海棠窠

過關渡水圖

短車無復駕青牛散策方來對白鷗煙水從容許君獨
暫須分我一船秋

河橋

桃李香中八九家青旗高挂綠楊斜
晚來風色渡頭急
滿地蕭蕭楊白花

石倉歷代詩選卷二百十五